



17 March 2020

Assalaamu Alaikum Wa Rahmatullahi Wa Barakatuhu

Mohtaram Waaldain aur Nigeraan,

Novel Coronavirus 2019-COVID-19- Jadeed Mashweray aur Ghair Mutawaqqeh Muamlaat ki Mansooba Bandee

Mai aap se raabta karrahi houn aaj ma'loomaat denay ke liey, aur kuch tasalli bhi denay ke liey iss pareshaankun waqt mei. Iss tez-raft wabaa', COVID-19, ne yaqeeni taur pe har taraf khauf-o-hiraas phailaaya hai. Apki Principal ki haisiyat se mai Australian International Islamic College community ko tasalli deyti houn ke hum barwaqt har mumkin qadam uthaa rahey hain na sirf apnay students aur community ke tahaffuz ke liey, balkey ye bhi tahaffuz karrahey hain ke hum aik mansooba tashkeel dey sakein iss ghair mutawaqqeh mustaqbil ke liey.

Mai saaf-goii se duhraati houn ke AIIIC mei **koi tasdeeq-shudah ya mushtabeh cases nahi hain COVID-19 ke**. Laikin hum ghaafil houn ge ager hum ne iss ko roakney ke liey, ya aisee haqeeqat ka saamna karney ke liey koi mansooba-bandee na kee.

COVID-19 ki nishaaniyaan aur alaamatein kia hain

- Bukhaar
- Khushk khaansi
- Halaq mei waram
- Saans phoolna

Ager aap inn mei se koi bhi alaamat mehsoos karrahey hain, baraey meherbaani doctor se fauree taur pe mashwerah keejiey aur khud-saakhta tanhaee (self-isolation) ikhtiyaar keejiey jub tak ke nataaij saaf na hou jaaein. Khud-saakhta tanhaee ka matlab ye hai ke aap apnay ghar mei rahein aur ghar ke baaher bilkul raabta na rakhain.

Students Ke Liey Tibbi Naseehat

Jou bhi student beemaar hai uss se guzaarish hai ke woh ghar pe rahey. Koi bhi student jou school mei beemar dikhaee deyta hai, usko foran ghar bhaj diya jae ga. Zehen mei rakhiey ke chaahay alaamatein COVID-19 ki houn ya kisee aur beemari kee, school mei beemar bachay nahi reh saktey. Ager apko phone kiya jaata hai ke apney bachay ko aakey collect kar lein, tou humei apka ta'awun chaahiey unko **foran** collect karney mei.

Humarey Bachoun ka School Mei Tahaffuz

Aaj subah mainey aik hidaayatnama jaari kiya hai ke tamaam ghair-zaruri, ghair-markazi school sargarmiyaan mansookh ya multawee kar dee jaaein. Ye amal-pairawee hai Mehekmay ke hidaayatnaamey ki, samaaji doori (social distancing) aur mu'ashrati khatrah mehdood karney ke liey. Iss se hifaazat hoti hai na-sirf humarey bachoun ki, balkey humarey gharoun aur baaqi mu'asheray ki bhi.

Iska matlab ye hai ke qareebi mustaqbil ke liey hum waaldain aur nigeraanoun se darkhwast kartey hain ke bachoun ko school pe drop karein, laikin classoun mei daakhil honay ya school mei jama' honay se guraiz karein. Ghair-markazi sargarmiyaan jou fil-waqt mansookh huee hain, unn mei ye shaamil hain:

- Harmony Day (Thursday, 19 March) - students phir bhi apnay saqaafati libaas pehen saktey hain aur class ki sargarmiyoun mei hissa le saktey hain. Albatta koi mushtarika khana nahi hou ga.
- Swimming tamaam campuses mei bila-tasreeh multawee kee jarahi hai.
- Cross-country multawee kia jaa chuka hai
- Saalana Quran muqaabla multawee kia jaaraha hai. Ye humarey calendar ka aik markazi muqaabla hai aur dobarah taey paey ga aik mamoon waqt pe.
- Baaqi campus-makhsoos sargarmiyaan jin ka ta'aluq parhaee se nahi hai, unhei bhi mansookh ya multawee kia jaey ga.

Namaz aur Namaz-e-Jummah ke Intezamaat

Inn mushkil waqtoun mei humei aisey faisley lenay hotay hain jou sehat-o-salaamti ko apna mehwar banaein. Iss wajah se, mainey hidaayatnaama jaari kia hai namaz aur namaz e Jummah ke muta'aliq, College Imam ke mukammal sahaarey ke saath.

Namaz

- Prep-Grade 4 ki koi makhsoos namaz nahi hou gee, albatta tamaam students zaati taur pe apni classoun mei apni namazein ada karsaktey hain
- Grade 5- Grade 12 namaz apni classoun mei parhein ge, humarey Imamoun aur Grade 12 leaders ke peechey. Carrara campus pe Year 5-12 ki namaz hall mei ada kee jaey gee.
- Tamaam students se kaha jata hai ke apnay musalley ya towel laaein aur inhei roazana ghar lejaein.

Jummah

- Ma'mool ki Jummah namaz mansookh kar dee gae hai, aur hum hidayat deytay hain ke **koi waaldain ya family** shaamil nahi hou saktey kisee bhi campus ki Jummah namaz mei.
- Prep-Year 4 ki koi khaas Jummah namaz nahi hou gee, laikin woh apni classoun mei zaati taur pe namaz ada kar saktey hain
- Year 5-Year 12 larkoun ki Jummah namaz classoun ke baher balconey ya baramdeh mei ada keejaey gee, Imam ki qayaadat mei 12:45pm baroz-e-Jummah. Cararra Campus mei mukhtasir Namaz e Jummah Year 5-12 larkoun ke liey Hall mei
- Year 5-Year 12 larkiyan apni classoun mei rahein gee, udhar zaati taur pe namaz ada kar sakti hain

Ghair Mutawaqgeh Atwaar ki Mansooba-bandi Baraey Remote Learning

Iss pur-aashob zamaaney mei mai school commmunity ko tasalli dena chahti houn ke hum anthak mehnat karrahey hain school bandee ki taiyyari ki, ager iski taubat bhi aa paree. School mundarja zail waqeyaati mei bandh hou ga:

- Tasdeeq-shudah case, ya
- Ehtiyaati tadbeer ke taur pe, school aur community ko khatrey se mehfooz rakhney ke liey.

Fil-waqt koi mansooba ya hidayat nahi hai school bandh karney ka, albatta ager aisa taey paya, tou mai safae se samjhaana chahti houn ke kia hou ga:

- Remote, ghar-se-kaam parhaee ke bastey taiyyar karrahey hain humarey sargarm teachers iss tehreer ko likhtey waqt.
- Inn bastoun mei project-based behtar parhaee ke saamaan houn ge.
- Koi naya kaam nahi shuru kiya jaey ga
- Aik makhsoos Islamic Studies ka pehlu shaamil hou ga, taakey humara mu'tabir Islami nisaab barqaraar rakha jaasakey
- Imtehaanaat ki shakal mei tabdeeli laaee jaarahi hai taakey kisee bhi student ka harj naa hou ager unhei ghar se kaam karney ki zarurat pesh aae
- Ghar-se-parhaee ke bastey students ko hard-copy ki shakal mei taqseem kiyae jaein ge iss haftey. Barae mehrbaani inhei students ke bags mei rakhiey ga, taakey waqt-e-zarurat ye fauri pohanch mei houn.

Waldain—Humei Aap Se Kia Chaahiey

Sub se pehlay, mai qadr karti houn iss bharosey ki jou aap ne mujh mei aur meri team mei rakha hai, humarey school ko iss pur-aashob waqt se guzaarney ke liey. Mai aap se sabr aur mafaahimat maangti houn. Iskay elawah, mai aap se ye bhi guzarish karti houn ke

- Ager apka bacha beemar hai, barae meherbani **unhei ghar pe rakhiey**
- Ager aap safar pe jaaney ka iradah rakhtey hain, faisley ki nazar-saani keejiey aur ye madd-e-nazar rakhiey ke waapsi pe aik **laazmi tanhaee (mandatory isolation)** ki muddat hou gee. Apko LAAZMI taur pe tamaam safar ke iraadoun ki khaber school administration ko deni hai email ke zariyey.
- Barae meherbani **apnay raabtey ki tafaseel** (moible phone, email aur daak patah) update keejiey apnay apnay campus ke paas, isko ehem jaantey huey.

Aakhir mei mai aap se mukhaatib houn AIIIC family ki haisiyat se, jou ke hum hain, kiyun ke hum sirf students, waldain aur staff ka ijtema nahi hain; hum aik family hain, aur iss wajah se aisee aazmaishoun mei jur ke rehtay hain. Mai aap se ilteja karti houn ke tibbi peyshaweroun ke mashweroun pe amal karein aur apna aur apnay pyaaroun ka khayaal rakhain. Koi shai humarey bachoun ke tahaffuz se ziyadah qeemti nahi hai. Doosra ye ke, mai aap ki madad aur bharosa maangti houn inn imtehaan ki ghariyoun mei.

Mai dua karti houn ke humarey mustaqbil ki raah roshan hou, aur Woh humari hidaayat karey, saaf-nazri aur aqjizee ke saath.

InshaAllah



Christine Harman

Principal